

三借廬筆談

清鄒弢撰

第三冊

進步書局校印

蘇平齋

PDG

三借廬筆譚卷七

金匱鄒汝翰飛纂

楊柳樓臺

辛巳春錢塘袁翔甫大令祖志於滬上北郊闢三弓地高樓大道踞地垂楊對宇為西人花園屋之後悉曲院月夕花晨笙歌四起致足樂也大令榜其門曰窺園詩社楊南湖伯潤題其額曰楊柳樓臺秀水金吉石書長聯云入座逞豪情好銷磨月夕花晨詩天酒地憑欄賞勝覽任領略馬龍車水人影衣香皆大令手製樓中茗碗薰爐位置雅潔葛隱耕孝廉首倡七律兩章投之一時和者幾及百餘家自題四首錄其二云要把繁華俗轉移大張旗鼓日吟詩春歸楊柳千條盡人在樓臺四望宜十里笙歌花簇簇六街燈火漏遲遲貧來百事從人借借得園林景更奇偶然平地學神仙名士名姬盡有緣百首新詩題壁上一樽清酒醉花前纔看棋局爭雙劫又聽琴聲響七弦也是浮生行樂處何須十萬買山錢黃筓雨文達云柳陰四圍碧人在畫圖間殘照送流水孤雲歸遠山花香吹斷續鳥語弄絲蠻佳士座中滿徜徉風月間忠州李羊仙士茶云吾曹無地起樓臺一室俄驚廣廈開六代精靈高會處九州人表不羈才千風白袷穿花出斜日紅裙闢草回認是倉山詩世界壁間珠玉朗吟來

余亦有七古一章云綠痕壓夢春雲冷。詩心洗透塵心靜。一片濃陰潑畫樓。繁華中闕清涼境。夙昔園林祖澤誇。倉山有主管鶯花。可憐兵燹消風月。竟使滄桑感歲華。餘生飄泊天涯走。辛苦微官課五斗。隴上猶懷諸葛桑。宅邊已負淵明柳。何處烟江侶釣徒。吟身銷瘦歷窮途。縱思金谷千尊酒。難展平泉一幅圖。生涯文字沾餘稅。經營買得三弓地。近市聊還平仲家。卜鄰許遂歐陽志。勝情何地不樓臺。了鳥文窗四洞開。幽綠一壺清夢穩。涼青滿地溼雲堆。撲簾烟重羅空翠。七尺闌干春替媚。長晝微薰花氣濃。斜陽悄逗詩魂醉。閒來選勝穩樓毫。春浦吟朋幾輩招。名士清樽十日酒。美人紅袖一枝簫。推袁壇坫傳騷雅。千里投詩兼賀厦。翰墨爭聯震海緣。風流重續香山社。耿耿惟我悔蹉跎。株守窮廬涕淚多。門外靡蕪青不了。相思空自託烟波。

詆朱

今人讀書於朱注往往索癡求疵實以朱注解釋未明而重注之處太多此節注某字某解彼章又然其當注之處反無一字注之避難就易考據空疏宜人之不滿於心也庸聞齋筆記載歸安凌厚堂堃以舉人大挑授金華教諭性堅僻初到官即書一聯於明倫堂云金匱萬千衷孔子曰孟子曰華哀百廿作帝者師王者師論學直宗孔孟於宋儒一概抹煞而尤

惡朱子。極口詆之。至謂朱子之父名松。與秦檜之檜同。而朱子名熹。則與檜子秦熈無異。語極狂悖。課人讀止誦白文。嘗與同鄉孫柳君孝廉談及考亭。孫稍右之。遂拍案大罵。至欲加以白刃。其惡朱如此。然胸中淹博。卜醫星相。無不精絕。應驗若響。著德輿子外集數十萬言。皆未經人道者。己未元旦。卜知明年將有大難。爰棄官歸。明年杭城果陷。其湖州城陷之前。預知賊某日犯鎮。屆期開門延友飲酒。以待賊至。執之去。偽王夙耳其名。令為軍師。大罵不肯。命之跪。罵益甚。偽王緩頰曰。一揖即縱若去。亦不肯。偽王怒。揮令斬之。延頸受刃。顏色不變而死。亦奇矣哉。

問花樓

蕙生詩多愁鬱。人謂其無福澤。若蘭生人既風流。詩亦蘊藉。讀其問花樓稿。通集無頽喪語。適人後嘗寄詩云。文鵞已逐鳳凰飛。何事重將舊事提。留得相思勝相見。大家彩筆寫無題。一往情深真乃以古誼相勗。其稿本藏余處。後為取去。姑就摘出者錄之。園中口占云。日暖晴光麗。吹來淡淡風。落花紅不定。香氣入空濛。舟過橫塘云。一櫂橫塘路。人疑鏡裏過。平沙眠鴨穩。清水聚魚多。小市喧前渡。斜陽媚晚波。秋風聲斷續。何處采菱歌。和蕙姊遊山詩云。第一吳中水。重來品雨前。塵心輸佛靜。世故喜僧緣。花雨空談法。山雲欲化烟。蕊珠宮不遠。

咳唾落誰邊。調余云。癡絕。瀟湘竟當真。多情肯羨讀書身。題詩笑。情磨香墨也。做門生侍立。
人送春云。誰將肥綠挽新紅。今日天光已不同。儂亦留春留不住。子規空自喚東風。雜詩云。
無人庭院夢初回。雲髻蓬鬆倦眼開。日影未斜簾早捲。讓他雙燕好歸來。花時韻事最關情。
偏是驚心物候更。不為傷春詩思懶。斜風細雨過清明。閒拋鍼繡倦無聊。尚有柔情不肯消。
愛聽秋來風雨好。自扶小婢種芭蕉。贈姊云。榮辱窮通付達觀。曠懷隨遇亦能安。一生獨有
關心事。春月秋花次第看。對鏡云。嫣然相對鏡中嬌。絕世丰姿畫裏描。怪底旁人齊說好。憐
卿儂也自魂銷。題梨花白燕圖云。濃雲飛白鎖黃昏。寫出銀箋墨尚溫。嫁得東風原有夢。照
來明月了無痕。院深人悄愁春語。簾靜香癡縷雪魂。卻愛雙棲清絕處。碎瓊滿地不開門。為
姊催妝云。強含珠淚賦催妝。一寸柔情九曲腸。鳳髻替籠金綽約。蛾眉細畫黛彎長。種成寶
樹三生果。留得文羅七日香。此去莫忘同命誓。好將彩筆繪鴛鴦。其餘如詩味餐香草。文心
麗落花。情多詩亦豔。量窄酒難瞞。離別常思母。嬌癡亦愛儂。風流傾四座。綺疏證三生。遠角
沈哀響。疎星耿曙光。吟來好句狂呼姊。聽得深情不贈人。壓線每因吟事誤。澆花不管繡工
忙。落花怨極翻無語。薄倖東風那得知。長堤香草多濃福。親近弓鞋步步嬌。秦始皇云。縱使
仙丹求海上。可憐黃石未曾逢。其餘佳句尚多。不能備錄。此則已見卷五

閨律

兩般秋雨盦載廣野居士妬律一則律例優長如老吏斷獄讀之使悍婦氣懾茲芙蓉外史又有閨律一卷雖亦遊戲之筆而判文之工巧命意之新奇尤足令薄倖郎君知所忌憚是亦閨房中輔化之初枕也因備錄於下

吏律○一凡青樓女子無論色藝若何概不准往來違者照官員私通外國例杖一百發外房門充當苦差判曰鳳子尋芳易入迷香之洞鴛兒愛鈔輕拋買笑之錢一登歌舞之場遂陷風流之陣章臺柳任人攀折大隄花惹爾顛狂須防惡疾纏身冉伯牛空歌采芣最恨窮途落魄鄭元和竟唱蓮花律以通寇之條允當眠香之罪杖懲既決戈荷難寬磨玷有期賜環不吝○一凡男子有事出門歸家以日暮為限踰時不至照違限例治罪若未經稟白留宿他所先杖八十再問有無宿娼情弊審寔另擬判曰花間短晷盼盡金烏樓上寒更燒殘銀燭妾向空閨待燕郎如岐路亡羊悔將羈鎖輕開遂使樊籠巧脫試問青樓捉醉何處追歡且言翠被薰香誰人伴寢楚岫之間雲暗度秦臺之明鏡高懸既貪良夜之遊合聽公庭之讞供如不寔法定加嚴○一凡遇閨人謹責宜低首恭聽不得遷怒小鬟違者照虐害平民例笞八十罰跪一炷香判曰唾面自乾豈復有丈夫之氣翻雲不怒亦斷無宰相

之懷乃我方獻其箴規而彼反遺乎簞楚秉性依然執拘借題偏易發揮身辱泥中畢竟伊
羅乎罪肉登几上豈容即虐無辜徒因逆耳之言故作劇牙之勢薄懲不貸長跪異辭○一
凡與閨人聚處不得嗟聲歎氣作種種不悅之色違者照誹謗朝廷例杖四十罰獨睡一個
月判曰紅窺簾隙初開觸念之花綠滿窗前新種忘憂之草大抵閨房之地宜多歡樂之
思有何心事難言惟見眉痕常皺豈為鶯閨燕語惱亂情懷無非楚館秦樓牽連愁緒腹應
暗誹嫌儂拘禁之嚴翼果能飛任爾遨遊之便不須研鞫徒飾虛辭決于杖而示懲請分牀
而各夢○一凡遇閨人責罰婢女不准代為乞免違者照屬員請託上司例杖四十即以該
婢應得之罪罪之判曰摧花折柳儂豈甘心惜玉憐春郎何情重倘念嬌肢費力不妨代
我揮拳怎當怒氣填胸輒欲為伊緩頰護身符巧為遮飾覆盆冤轉替呼號毫無皮肉相連
何關痛癢只覺心腸太軟憤發慈悲乞寬解網之恩恐有同裳之好諒甘身代難徇情私饒
舌可憎扑臀非枉○一凡男子外間有事不能陪侍閨人一日須至閨中起居數次違者照
無故不朝參公座例笞四十拘禁內房一個月判曰影隔罨幃已等山遙水遠身踰閨闥
便同雁杳魚沈既違共食之常兼失問安之禮縱談有客難教驪母呼君獨繡無人只賸狸
奴伴我可惜香圍翠幙蜂慣離衙緣何燈炮銀缸燕縵歸壘比擬朝參之失允符吏議之公

加以拘攣。申明法度。○一凡婢女分食糕果。不得從旁乞取。違者照簠簋不飭例。姑免笞責。罰銀二兩充公。判曰。紅梨白棗。羞分奴輩之甘。膳餅殘餽。恥作乞兒之相。豈是清饒莫解。不覺流涎。並非異味難嘗也。思染指徒貪。蕩浪願食。嗟來雖飢渴之常情。亦風流之小過。倘使分羹示惠。易啟黏花惹草之端。如其與塊蒙憐。定學紵臂牽衣之狀。既官箴之有玷。宜閭法所難寬。刑杖姑饒。罰銀充當。○戶律。○一凡閨人遇事他出。或留婢女在家看守房屋。不得乘機引誘。違者照搶奪良家婦女例。加一等杖八十。枷號外房門一個月。判曰。荆蠻跋扈。常存問鼎之心。陽虎猖狂。時作竊弓之想。徒以扞揠之密。難為寇盜之乘。乃儂因留以巡營。纔可離夫戎帳。而郎已勇於挑戰。竟思挾彼重關。事悔疏防。罪難曲宥。侵邊有禁。那容互谷偷開。專閫獨嚴。不許陳倉暗度。褫衣重責。囊不加刑。毋使息肩。庶期革面。○一凡婢女在旁給使。不准語言戲謔。眉眼傳情。違者照拐騙人口例。杖八十。罰跪一炷香。再聽發落。判曰。弄月嘲風。怪爾言多輕薄。檢花檢柳。禁他情不顛狂。慣來鸚鵡窗前。戲搜游語。要向櫻桃樹下。密訂佳期。縱非有意留情。亦覺旁觀不雅。莫謂偶然調笑。個男兒盛德無傷。須防從此纏綿。小鬼頭春心亦動。剥膚自取。大杖難逃。屈膝休憐。炷香為度。○一凡親戚年輕婦女往來。雖准其相見。然宜引嫌離坐。不得挨近身體。恣意談笑。致生事端。違者照強娶有夫婦女

未成例杖八十枷號外房門一個月。判曰：朱鳥窗前，原許劉楨平視；青綾幃外，堪同道蘊清談。惟是禮別巾櫛，豈可倚裳聯袂？嫌多瓜李，那容浪謔狂言。雖然彼美堅貞，自切投梭之拒；只恐個人佻達，妄邀解佩之歡。隨身未及周防，出語總嫌唐突。含櫛衣而重責，并荷校以示懲。○一凡閨人妝奩中物，如釵環鈿釧搔頭約指之類，概不許私自送人。違者照偷盜倉庫例，榜一次，敲八十。原物追還。判曰：鏤鳳雕龍，鈿盒是定情之物；嵌珠點翠，簪環多賠嫁之資。倘逢沽酒留賓，金釵願拔；那許借花獻佛，形管私貽。因為雜佩之投，來作大弓之竊。奩開碧玉，錢訝蚊飛。箱啟翠雲，杯疑羽化。探丸自得，祇圖揮霍之豪；胠篋偏工，豈任慢藏之咎。事同蠹食，律並鼠偷。聊示薄刑，責歸原璧。○一凡庭前雜種花卉，祇供閨人插戴，不許折贈鄰家姊妹。犯者照糜費錢糧例，榜一次，敲四十。原物追還。婢女傳送并罪。判曰：采蘭贈芍，無非鑽穴之媒；報李投桃，總是踰牆之漸。自會眉邊染黛，何須錦上添花。任他淡淡妝梳，豈干卿事。要爾紛紛饋送去，助誰嬌思；憑滿苑芳菲，暗遞隔牆消息。漫勞雅蝶引來，窺玉之人；擬託狂蜂帶去，偷香之客。扑髻姑免，械指須嚴。春從鏡裏追回，罰比泥中加等。○一凡男子需用箱籠中物，須咨稟閨人親手檢付，不得擅令婢女啟鑰。違者照私虧錢糧帑銀例，答八十。婢與同科。判曰：巧瞞鸞母，偷開翡翠之籠；私喚鴉鬟，輕啟葳蕤之誚。不顧衣裳顛倒，任將箱

簾翻騰。可知室有小君。取攜甚便。莫謂家無長物。搜索無妨。青衣之側媚堪憎。赤棒之嚴威何在。因援漢律。同廩內府之金。試問秦人。誰掌北門之管。雖非鼠竊。終覺狐疑。先責檀奴。次懲菊婢。○禮律。○一凡尼菴女觀。不准借燒香為名。私行遊玩。違者照奉行邪教例。杖六十。鎖禁外房門一個月。至僧道寺院不問。判曰。青豆房中。巧鑿藏香之窟。黃花觀內。私開行雨之場。名為剪髮披緇。皈依清淨。寔則貪風愛月。引誘輕狂。只知彌勒龕深。不顧金剛杵猛。豈願郎登蓮界。惟防媚奪瑤光。佛門廣大。而能容閻法森嚴。而莫挽蒲鞭。既試木索。須關如從釋道往還。不在閨房例禁。但無留宿。概免深求。○一凡外間婦女。私贈表記。如荷包手帕。巾鞋香串等物。概不許攜帶入房。犯者照士子懷挾入場例。杖八十。追贓入官。判曰。酒邊喝雉。賭來妙伎香囊。枕畔聞雞。偷得佳人羅帕。緣訂衾稠之好。遂邀瓊玖之貽。貪看繡鳳描龍。誇他心巧。愛襲零香。斷粉惹爾魂迷。藏諸懷袖之間。已覺罪無可逭。攔入閨房之內。尤為法所難容。試援議置之條。允合科場之弊。宜加重杖。并索真贓。暫令小婢收藏。以備下人賞賜。○一凡遇閨人訓飭。當面耳順受。深自悔過。不許嘵嘵置辯。違者照鼓噪公堂例。答一百。罰跪一炷香。判曰。誨爾諄諄。不靳耳提面命。聽雖諾諾。還防口是心非。緣何舌竟翻瀾。居然強項。不信頭難點石。太覺頑皮。惟聞一派胡言。敢藐三章約法。豈是無癩可索。儼故吹毛。

須知有迹堪憑。郎難置喙。欲懲狡辯。姑予薄刑。近曳牀頭。痛加鞭背。更令泥辱。用肅房規。○
一凡遇親戚間話。不許談論閨人短處。違者照卑幼辱罵尊長例。杖四十。批頰八十。罰飲洗
臉水一碗。判曰。燦金口眾。但憑人吐雌黃。護玉情深。當為儂分皂白。豈有同衾鳳侶。反來
止棘蠅謔。浪云情性乖張。心堅似石。動謂容顏粗醜。眉遠非山。不嫌外客多疏。背談可恨。即
使細君有過。面諫何妨。居然娓娓。堪聽不啻申申。具言杖臀難宥。挾古姑寬。將儂醜臉香湯
為爾湔腸妙藥。休嫌脂膩。定要杯乾。○一凡男子或因閨人約束過嚴。有意捏造。旁人譏訕
之詞。冀聳聽聞。察出照妖言惑眾例。笞六十。批頰四十。罰飼犬三日。判曰。蠶尾興歌。要爾
關心則甚。蛾眉見嫉。任他嚼舌何妨。乃因防範之嚴。故作招搖之語。術工搗鬼。志在嚇人。豈
真川潰難防。不容掩塞。縱使風聞是寔也。合包瞞。何來詭計多端。假說謗書盈篋。郎自啟謔
夫之口。儂甘居悍婦之名。罪合敲牙。刑先杖脊。罰供賤役。庶警刁風。○一凡遇閨人將有差
遣。不得預先躲匿。違者照臨場規避例。笞八十。罰跪一炷香。判曰。疊被鋪牀。自有了頭服
事。煎茶換水。敢令夫子當差。偶然對鏡。盤雲花須爾戴。或者開簾拜月。香要郎燒。無非暫當
嬌鬟。不算輕勞貴手。豈意狡同兔脫。翻嫌驅使之煩。居然巧比魚潛。預作迷藏之計。不甘供
役。偏愛偷閒。例以校士規條。無許臨場丐免。竹刑宜服。鞠踞從寬。○一凡遇閨人對鏡理妝。

須在旁手進篦梳不得與小鬟從背後扮作鬼臉違者照朝賀失儀例杖四十罰倒洗臉水兩個月。判曰筆尖染黛畫眉爭羨張郎奩角凝香碾粉曾傳蕭史只要多情之夫婿使留住佳話於閨房乃毫無愛賞之心而反作揶揄之狀似謂鬟非墮馬何須貼翠塗黃定嫌貌醜沈魚不配濃妝淡抹妄議綠窗之梳洗致干烏府之糾彈有忝朝儀須繩閹律官刑罔貸婢役宜供。○兵律○一凡男子未曾稟命私自買妾別置房屋潛往食宿察出照謀反叛逆已成例杖一百夾一次發灶下婢為奴永不許入房妾發官賣房屋器具衣飾衣物查抄入官知情不舉者坐同謀者照本犯減一等治罪。判曰握雨携雲別築藏嬌之館偎紅倚翠新翻得寶之歌暗將桃葉迎來偷把珍珠量去鴛幃密擁忍拋並蒂之蓮免窟潛營巧護旁生之蕪黑心符誰能遣此白頭吟於女安乎雖云買妾無妨娶何不告可識停妻有罪法更難容須服上刑痛懲大逆即交爨婢俾作鉗奴既無伉儷之情宜絕綢繆之愛楊枝立遣瓜蔓全抄根究加嚴株連並逮。○一凡男子有事他適當先至閨中稟白不准私自出門違者照武弁擅離汎地例笞四十嚴加審訊若與婦女有約乘間竊往再杖八十鎖禁外房門一個月。判曰柳巷花街固非君等遨遊之地茶寮酒幔亦豈文人徵逐之場只貪微服而行不告當官之假尋爾來蹤去跡累儂挂肚牽腸先予薄懲更加嚴鞠可是玉扉輕叩潛為花底之

遊或因金鎖偷開巧赴桑中之約。非北里之名倡暗誘。即東鄰之美女私招。供狀既真。爰書立判。朱籤再掣。黑索牢拴。○一凡婢女年已及笄。應聽閨人遣嫁。不得從中牽制。違者照阻撓軍務例杖六十。婢仍遣發。判曰。懷春有女。剛逢嫁杏之期。獨處無郎。已及標梅之候。祇合售同玉銜。倩彼雉媒。豈宜秘共珍藏。遲他鴛侶。儂方切結縞之誠。爾偏存留帶之思。倘非欲災流涎。何因越俎。不是看花眼熱。那用遮欄。分明意在偷歡。遂至事多掣肘。杖宜立決。法不容撓。速賦催妝。毋勞妄想。○一凡閨中情事。不得與外人談論。違者照洩漏軍機例批頰八十。罰倒脚盆水十次。判曰。閨房之事。有甚畫眉牀第之言。豈堪饒舌。徒以供人諧謔。遂同笑柄談來。居然費爾風流。不碍和盤托出。博得閨堂大嘍。爭禁滿座傾聽。細摹雨意雲情。郎顏太厚。盡吐花盟。月誓。妾面堪羞。爰徵擬罪之條。恰合漏師之例。扑臀雖恕。批頰非寬。飭傾豈菟之湯。俾識蓮花之味。○一凡遇閨人訪問外間情事。須據實稟供。不准隱瞞。違者照地方官諱盜例杖四十再訊。判曰。女子善懷。難免尋蹤問迹。男兒薄行。須防竊玉偷香。然來溫嶠之犀。形原莫遁。照到秦宮之鏡。膽亦應寒。乃不將寔事招承。而反用虛言搪塞。非比捕風捉影。那容露尾藏頭。雖然自己含羞。終當告我。豈有外人可道。偏要瞞儂。既圖掩飾。之工。須下榜筆之令。事宜根究。語漫支吾。務得真情。期成信讞。○一凡男子差遣婢女。須先向

聞人稟明何事何往方准出門。違者照擅調官軍例。答六十。再問有無潛往所私處饋送物件。傳遞消息等弊。審寔另擬。該婢不即首告。私自奉行。并罪。判曰。威原獨擅。曾藏閨內之符。今豈自公。誰擊軍中之鼓。不謂無端之差調。反為有意之隱瞞。豈欲請命而無從。遂至甘心於獲咎。應是以報瓊貽玖。暗通黃犬之書。或因之密約幽期。藉作青鳥之使。重加榜掠。速即招供。彼非恃為腹心。焉肯資其臂指。即無受賄。亦是獻勤。並制官刑。用申閹禁。○一凡閹人委辦事件。立即奉行。不得遷延觀望。違者照違誤軍機例。答四十。事仍發遣。判曰。下璇閨之將令。嚴若雷霆。發香閣之兵符。急於星火。傳命比郵籤之速。剋期防羽檄之遲。是宜踴躍以趨公。豈得因循而誤事。何用瞻前顧後。徒存玩法之思。依然陽奉陰違。顯蹈失機之咎。既干閹政。應隸刑書。須遵帷幄之謀。莫待析楊之至。速圖後效。以贖前愆。○一凡閹人遇事他出。將次回家。須在門首恭候。不得遠離。違者照違誤驛站例。答四十。罰煎茶三日。判曰。香飄翠幃。乘來油壁之車。影豔紅窗。迎到沙棠之楫。微遮金扇。生怕人看。蓮隔珠簾。應聞郎笑。豈意重門寂寂。徒勞虎吠花陰。緣何深院沈沈。但聽鸞呼架畔。殊失趨承之節。應干疏慢之愆。究從何處陶情。不甘孤待。試問今宵挽頸。可要雙眠。姑予輕篋。罰司香茗。欲尋鴛夢。須進龍園。○一凡過閹人燈下針黹。須在旁陪伴。不得託故先睡。睡者照營務廢弛例。答四十。

罰獨睡一個月。有病免究。判曰：銅荷小剔，紅搖一穗之燈，繡譜閒翻，彩擘五紋之線，倘肯同消良夜，何妨陪爾讀書。縱教閒坐深更，也合遲儂就枕。豈是宿醒未解，不禁倦態難支。先登雲雨之峯，身將誰伴。孤擁薰香之被，夢亦何甘。試聽寒漏聲過，不顧空房膽怯。宜加懲創，以醒瞢騰。既貪永夕之安，且識獨眠之況。如逢小疾，合示優容。○刑律：○一凡閨人年不過四十以上，不准起意蓄妾。違者，照圖謀不軌例，杖一百，徒半年。期滿釋回，再聽發落。判曰：白傅之求樊素，已在良年。坡公之納朝雲，亦非壯歲。大抵偏房之置，恆為娛老之謀。乃今則妾尚朱顏，采蘋竟遺下體。郎猶青鬢，貪花莫禁狂懷。安思取媚爭妍，祇是喜新厭故。逆端既兆，春秋嚴誅意之條。香夢徒縈，惟懼重詰。奸之任，宜懲官杖。俾隸鬼薪，以待及瓜。再歸司李。○一凡婢女年過十四以上，男子不得入其卧房。違者，照寅夜入人家，非姦即盜例，杖八十。枷號一個月。若係該婢勾引，依例減一等。婢發官賣。判曰：顛狂粉蝶，祇防深入花叢。隱現金鱗，偏愛潛藏水底。彼已及破瓜之歲，爾或存吸蔗之心。須知賤列青衣，承恩最易。莫謂近連朱闥，越境無嫌。棒喝先施，枷懲不貸。或者態工狐媚，妄誇西子之顰。因而語學鶯偷，思擅東君之寵。郎宜未減婢，定難容。速倩蜂媒，售充魚騰。○一凡變童免客，以及年少優伶，概不准交接。違者，照結納匪類例，杖一百。罰倒馬桶一個月。與文人往來聽。判曰：花陰解佩，私

邀斷袖之歡。席畔飛觥。遽密分桃之愛。別有兔園可入。居然烏道能攀。洞許尋源。不顧陰陽顛倒。戰誇背水。任教雲雨掀翻。祇因戀彼後庭。遂至虛儂前席。事同胯辱。罪合肉刑。既喜納污。宜令滌廁。倘使交來文字。捉塵談詩。不妨款以壺漿。殺雞為黍。無庸鼓瑟。速遣調羹。○一凡外間使令。皆用蒼頭。不得私蓄俊僕。違者無論有無情弊。俱照難姦例。杖八十。枷號一個月。該僕逐出。判曰。忍答不去。難求。穎士之奴。飲水偏甘。誰似子淵之僕。只要履箱解捧。垢面何妨。但期詩料能馱。蓬頭亦稱。祇是尋常之役。何須婉孌之儻。分明愛彼卯宮。遂欲藏之甲帳。薰香婢周防有我。免爾探花。讀書堂照顧無人。任伊鑽李。既貪烏合。當置象刑。先撻尻輪。次加頸木。亂風必儆。禍水速除。○一凡婢女傳送茶湯。不得牽拽衣袖。拔扼手腕。犯者照強姦良家婦女例。杖八十。罰樓板上睡十夜。判曰。不是臨歧執別。何須孽子之祛。並非拯溺從權。豈得援人以手。私遞雙眉之語。陰圖一握之歡。婢子情多。定必隨郎宛轉。女兒膚膩。豈容任爾摩挲。但教低捧金甌。非供調笑。倘使頻沾玉體。難免橫陳。因盟染指之恩。致取剝膚之痛。休嫌席地不准同牀。○一凡交游聚處。不准談論他家婦女姿色。及一切穢褻之事。違者照誣告平民例。批頰四十。與談之人。立即逐出。永不許往來。判曰。手揮麈尾。居然自詡風流。目豔鴻姿。輒欲共評月旦。妄擬瘦肥之態。兼工淫穢之辭。言之若甚快心。聞者皆將

掩耳修眉廣額徒供諧謔之資。斷雨雲總屬荒唐之語。君偏樂道。僕已私聽。事涉閨幃。罪同誣讎。姑從寬典。僅置薄刑。宜嚴逐客之條。永著絕交之令。○一凡遇閨人卧病。須終日在房料理湯藥。并聽使喚。不得托故躲匿。違者照罪人逃亡例。杖四十。鎖禁內房。候病起釋放。判曰。禁寒惜暖。全憑慰體之人。賞藥和羹。較勝粗心之婢。欲識恩情之重。但看疾病之時。如其憐我呻吟。當必為儂憔悴。豈意潛藏相外。不管醫來。翻因宛轉牀頭。巧從郎使。匿迹祇圖安逸。捧心誰替。摩挲忍教。頰頰顰眉。疾藜久因。任使呼榮索茗。鸞鳴空應。刑象難寬。圈豚立禁。待離鴛枕。始救雞竿。○工律○一凡閨人。有事他出。房中局鎖箱櫃。不准私自開動。違者照侵盜公項例。拶一次。敲四十。再問有無偷盜情弊。依律重擬。判曰。守藏人虛。空有魚局之設。洞垣術巧。忽萌狗盜之思。或因情急。呼盧謀偷。鳳釧豈是計圖。換酒笑典。鸞裘漫為盡篋之搜。竟等嚴闔之奪。私開金鑰。撩亂衫裙。重檢香奩。拋零環佩。作賊斷無空過。得賊那許終瞞。僅施敲扑之威。未蔽穿窬之罪。再從嚴訊。冀獲真情。○一凡閨人。委辦物件。須挑選上等精選之品。充用。不得以低爛惡劣者塞責。違者照承辦工程不力例。笞四十。發回另辦。判曰。翠鈿珠環。只怕爐工欠巧。杏衫香帶。總宜花樣翻新。雖然粗蠢容顏。無須愛好。爭奈嬌癡心性。偏欲爭高。緣何閨閣之需。必較錙銖之值。不是儂貪錢費。可知佛要金裝。鬻添時式。